

Malaika Huwahudumia Warithi wa Wokovu

Je! Hao wote si roho watumikao, wakitumwa kuwahudumu wale watakaourithi wokovu?—**Waebrania 1:14.**

Mungu anao malaika ambao kazi yao yote ni kuwavuta wale ambao watakuwa warithi wa wokovu... Kazi ya malaika ni kuzizuia nguvu za Shetani.

Kazi ya viumbe hawa wa mbinguni ni kuwaandaa wakazi wa ulimwengu huu kuwa wana wa Mungu, wasafi, watakatifu na wasiotiwa unajisi. Lakina watu, ijapokuwa wanakiri kuwa wafuasi wa Yesu, hawajiweki mahali ambapo wanaweza kuelewa huduma hii na hivyo kazi ya wajumbe wa mbinguni inafanywa kuwa ngumu. Malaika, ambao daima huutazama uso wa Baba huko mbinguni, wangechagua kubaki karibu kando ya Mungu, katika mandhari ya usafi na utakatifu wa mbinguni; lakini lazima kazi ifanywe katika kuleta mandhari hii ya mbinguni kwa nafsi ambazo zinashawishiwa na kujaribiwa, ili kwamba Shetani asiweze kuwafanya kutofaa kwa ajili ya mahali ambapo Bwana angewataka kupajaza katika nyua za mbinguni. Falme na mamlaka katika ulimwengu wa roho huungana na malaika hawa katika huduma yao kwa wale ambao watakuwa warithi wa wokovu.

Malaika ambao watakusaidia kufanya kile ambacho huwezi kujifanyia, wanasubiri ushirikiano wako. Wanakusubiri ili utikie ushawishi wa Kristo. Mkaribieni Mungu na mkaribiane ninyi kwa ninyi. Kwa shauku, kwa maombi ya kimya, kwa kuzipinga mamlaka za kishetani, weka mapenzi yako upande wa mapenzi ya Mungu. Unapokuwa na shauku moja ya kumpinga Shetani na kuomba kwa dhati, "Niokoe toka majaribuni," utapata nguvu kwa ajili yako kila siku. Ni kazi ya malaika wa mbinguni kumkaribia yule aliyeshawishiwa, kujaribiwa na kuteseka. Wanafanya kazi kwa muda mrefu na bila kuchoka ili kuziokoa roho ambazo Kristo amezifia. Na watu wanapokubali utendaji wao, wanakubali msaada wa mbinguni waliotumiwa, huitikia utendaji wa Roho Mtakatifu kwa niaba yao; wanapoweka mapenzi yao upande wa mapenzi ya Kristo, malaika hupeleka habari hizo mbinguni.... Na kisha kunakuwa na furaha katika jeshi la mbinguni.